



29. august 2017

UKA 2017/42

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq saqqummiuppara:

Qanoq iliorluta mingutsitsineq annikillisarniarlugu eqqaanermut atortut puussiat plastikiusut atorunnaariartortinnissaannut suliniuteqassanerluta apeqquteqaat aallaavigalugu Inatsisartunut oqallisissiassatut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Ukiuni kingulliunerusuni nunatsinni plastikkimik atuinerput annertusiartorpoq. Plastik puussianut assigiinngitsunut atortuarparput. Nerisassanut, qerisunut, ittujaarsivittut, pisiniaraangatta puussiatut, eqqaanermullu atorparput. Plastikkinik atuinerujussuatsinni iluarusunnitsinnilu eqqarsaatigisanngilarput puussiat qanoq mingutitsitiginerat.

Plastik arrortikkuminaatsuvoq, taamaalillunilu pinngortitami nungutikkuminaalluni. Uumasunut nerisareqatigiinnut tappiorannartunngorluni (microplast) akuliuttartooq paasereerparput. GUX-mi ilinniartut paasisimavaat allaat saarullit microplastitaqartut. Nunarsuarmi imarsuarnut plastikkerpassuit eqqarneqartartut patsisigiinnarnagit uagut nunatsinni iliuuseqartariaqarpugut.

Eqqakkat nalinginnaasut igaffitsinni puussianut poorlugit silatitsinni puussiarsuarnut igittarpagut. Taakkorpasuit allallu puussiat ikuallanneqartarput, peqqinnanneqisumillu pujuliortarlutik.

Suli pitsaanginneraavoq puussiat plastikkit pinngortitamut eqqaannarneqaraangata. Arrortikkuminaatsuugamik sivisoorsuarmik nungujartortarput, pinngortitamut uumasunullu ajoqutaagalutik. Imartatsinnut eqqaaneq ajoqutaasaqaaq motorinullu aserorsaataasarluni.

Peqqinnissarput pillugu, pinngortitallu asattuunnissaa peqqutigalugu plastikkinik atuinitta annikilliarternissaa politikikkut anguniartariaqarparput. Nunaavugut immamik, imermillu amigaateqanngitsoq, taamaammallu eqqaaviit spandit pisariunerugaluartut atortariaqarsinnaavagut. Pisanut puut allat atornissaannut pikkorinnerusariaqarpugut.

Nunarput pinngortitarsuarlu eriagitigu ataatsimoorlutalu aaqqiinissamik piumassuseqarluta oqallisigalugu.